

Frantzia arrantza akordioa berriz negoziatzeko prest dago

Baionako kaia blokeatzen segituko dute arrantzale pelagikoek

Jean Marc Barr CFDTko Estatuko arrantza delegatuak ziurtatu duenez, Frantziako Arrantza Ministerioa arrantza akordioa berriz negoziatzeko prest dago. Ministerioak elkarizketa proposatu zien arrantzaleei portua desblokeatzearen truke, baina hauek ez dute onartu.


Hur Gorostiaga / Baiona

DONIBANE-LOHIZUNE eta Hendaiako arrantzale pelagikoek hirugarren eguna bete zuten atzo Baionako portuaren blokeoan. Goizean, Jean Marc Barre CFDTko delegatua izan zen arrantzaleekin, eta bezperan Remy Toussinekin, Frantziako Arrantza Zuzendaritzako ordezkariarekin, izandako bileraren berri eman zien arrantzaleei. Barrek ziurtatu duenez, «Frantziako Arrantza Zuzendaritza atzera egiteko prest dago, 1992. urtean Espainiarekin sinatutako akordioa berriz negoziatzeko prest dago».

Gisa horretan Ministerioa kalteordainez hitz egiteko prest legoke, egunotako galerak estaltzeko. Beti ere Barreren hitzetan, «arrasteko untzi bakoitzeko kuota eta arrantza alde berezia finkatzearen aldekoa da Frantziako Gobernuak».

Nolanahi ere, gai hauek guztiak zehazteko Toussin Baionara etortzeko asmoa du, beti ere «blokeoa altxatzen bada», CFDTko ordezkariaren hitzetan. Hala ere, arrantzaleek ez zuten horrelakorik onartu eta blokeoan segitzea erabaki zuten atzo. Britainiako arrantzaleek beren sustengua adierazi diete Hendaia eta Donibaneako arrantzaleei.

Frantziako Arrantza Ministe-



Frantziako Arrantza Ministerioa akordioa berriz negoziatzeko prest da. JAGOBA MANTEROLA

rioak argibide gehiago eman ez badu ere, sindikatuko kideek azaldutakoak harridura sortu du. Izan ere, akordioa 1992an sinatu zen hogeituroko iraupenarekin. Gainera, akordio horrek Frantziak trukean jaso duen kuotako milaka arrain tona baldintzatzen ditu.

Bizkitartean zortzi garraio untzik blokatuak jarraitzen zuten atzo, lau ezin sarturik eta bertze lau ezin aterarik. Jean Marie Berkmans Industria eta Merkataritza Ganbarako lehendakariak «portua blokeaturik dagoen bitartean hamar milaka libera galtzen» dituztela azaldu zuen.

«Gainera, egunotan enpresa berri batekin akordioa egiteko asmatan gara eta horrelako gertakizunek ez dute batere laguntzen. Une honetan 600 langile daude blokeaturik eta honek ezin du iraun. Administrazioari neurriak lehenbailehen har ditzan galdegin diogu».

Gisa berean, Berckmansek Remy Toussinekin egin beharreko bilera ahalik eta azkarren egin dadila eskatu zuen, arrasteko azken berriek ziotenez Toussin atzo bertan Baionara etorri zen arrantzaleekin mintzatzeko asmoz, baina hauek biltzeari uko egin zioten. X

laburrean

■ Lau enpresa atzerrira zabalduko dira SPRIren laguntzarekin

LAU euskal enpresak, Izarbarri, Gamesa, Santa Ana de Bolueta eta Irizarrek, 40na milioi pezeta eskuratuko dituzte SPRI (Industri Sustapen eta Eraldaketarako Baltzua) atzerrian kokatzeko dituzten proiektuak laguntzeko. Izarbarri lan elkarteak 624 milioi inbertituko ditu Mexikon hango Herramientas Greenfield enpresarekin elkartuta erreminta planta bat zabaltzeko, eta 110 lanpostu sortuko ditu. Gamesak ere autogintzarako osagarriak egiteko lantegia zabalduko du Brasilen, 1.960 milioi inbertituz. Bilboko Santa Ana de Bolueta enpresa siderurgikoak Txilen duen lantegia handitu egingo du. Azkenik, Irizarrek Kantabriako Alsarekin batera autobus lantegia zabalduko du Txinan, 1.164 milioi pezeta inbertituz. X

■ Nekazaritza lurra «edonola» erabiltzen dela salatu du Gipuzkoako EHNEK

EHNE sindikatuko Gipuzkoako 1.700 kideren izenean 80 ordezkari bildu ziren iragan larunbatean Donostian, datozen urteetako estrategia eta helburuak hitzarteko. Baserritarren sindikatuaren funtsezko filosofia berretsi zuten ordezkariak: lurralde lotutako nekazaritza eta abeltzaintza, inguruarekin orekan dagoen jarduerak eta kalitatezko elikagaien produkzioa. Helburu horietara heltzeko bideak ere landu zituzten baserritarrek. Lehenik eta behin, gizartearen sentsibilizazioa premiazkoa dela ikasi dute EHNEko afiliatuak, eta ekimen horri eutsiko diote datozen urteotan ere. «Baserritarren zeregina kalitatezko elikagaiak produzitzea da, elikagai osasungarriak alegia. Baina kontsumitzailearen esku dago guk irautea, erosten duenean nekazaritza eredu jakin bat hautatzen duelako», adierazi dute sindikatuko ordezkariak. X

XOUSE SIMAL



ARNkoek «opor gutxiago eta lan gehiago» aldarrikatu dute

ARNko ehun bat langile Bilboko Erakustazokan manifestatu ziren atzo, Expovacaciones azokaren inaugurazioarekin batera, untiolaren egoeratik protesta egin eta Administrazioaren sustengua eskatzeko. Opor gutxiago, lan gehiago aldarrikatu zuten langileek eta arraultzak jaurti zituzten Erakustazokara.

Lanbide Heziketarako Euskal Akordioa garatuko duen fundazioa abiatzeko konpromezua berretsi du Ardanzak

■ PPK eskakizun hori onartzen ez badu fundazioaren ardura Jaurlaritzak berak hartuko duela esan du

Erredakzioa / Donostia

LANBIDE HEZIKETARI buruz urrian sinatutako akordioa beteko dela ziurtatu zuen Jose Antonio Ardanza EAEko lehendakariak atzo Iruñean. Lehendakariak esan zuenez, PP alderdiarekin negoziatzen ari dira Lanbide Heziketarako Euskal Akordioa nola finantzatu. Espainiako UGTk eta CCOO PPrekin egindako bileraren ostean zabaldu den informazioaren arabera, alderdi hori ez dago «Forcemen kutxa bakarra hausteko prest». Horregatik Euskal Akordioa finantzatzeko Europako Batasunean beste baliabide iturririen bat aurkitzeko prest agertu da PP, beti ere hedabideek zabaldua-

koaren arabera.

Nolanahi ere, Espainiako Gobernuak akordioa garatzeko modua jartzen ez badu, Jaurlaritzak hartuko du horren ardura. «Hamar edo hamalau egunen buruan jakingo dugu PPrekin erantzuna baiezkoa edo ezezkoa den. Adostasunik ez badago, orduan Jaurlaritzaren esku egongo da fundazioa sortzea, urrian onartuta dagoenez», azpimarratu zuen Ardanza. Hala ere, ezer baino lehen, patronalaren iritzia jakin nahi du Ardanza lehendakariak, «Confebasken konpromezua lortu beharko dugu».

Lanbide Heziketarako Euskal Akordioa urrian sinatu zuten sindikatu guztiek (UGT eta CCOO barne), Confebaskek eta

Eusko Jaurlaritzak, baina Espainiako Forcemek —UGTren eta CCOOren oniritziarekin— ukatu egin zituen akordioa garatzeko baliabideak.

Orduan, ELAk eta LABek Euskal Akordioaren aldeko kanpaina ekin zioten, langileen sinadurak bildu zituzten eta kalera irteten ziren akordioa gauza dadin aldarrikatzeko. Ardanzarekin herenegun izandako bilera ere kanpaina hori lotua da.

CCOO gogor kritikatu ditu bileraren ostean ELAk eta LABek egin zituzten adierazpenak. «Heziketak ez ditu arduratzen. Beren gehiengo sindikalaren balioa erakutsi nahi dute eta mugimendu sindikala kontrolpean izatea nahi dute, besterik ez», adierazi

du CCOO LAB eta ELA buruz prentsa ohar batean. «Norgehiagoka ibiltzeak ez du zentzurik gaur egun».

Guillermo Etxenikek Gipuzkoako Foru Aldundiko Ekonomia buruak ere ELA eta LAB kritikatu egin ditu. «Herri honetan tentsio eta mehatxu gehiegi dago eta elkarriketarako jarrera positibo gutxi. Ezin da zalantzan jarri ELA sindikatu demokratikoa denik, baina ELA ezin da instituzioetan sinesten ez duten horien jokoa erori». Etxenikeren ustez, Lanbide Heziketa ezin da helburu politiko bilakatu. «Helburu ekonomiko bat da Lanbide Heziketa lehiakortasuna aregotzen duela eta sare industriala sendotzeko baliabide ona delako». X



HONDARRIBIKO UDALA

IRAGARKIA

JENDAUERREKO ERAKUSKETA

1996KO LANDA ETA HIRI ONDASUN HIGIEZINEN GAINEKO ZERGAREN ERROLDENA

1996KO EKONOMIA HAR- DUEREI BURUZKO ZERGAREN MATRIKULARENA

Erakusketa lekua: Errenta Saila.

Ordutegia: Astelehenetik ostiralera 9etatik 13 ordutera.

Aztertu eta erreklamazioak aurkezteko epea: Hamabost lanegunetako, G.A.On iragarki hau argitaratu ondoren eta ondorengo lanegunetik zenbatzen hasita.

Hondarribia, 1996ko apirilak 2. ALKATEA.